

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 14.10.2024

प्रमुख समाचार –

- प्रशासनिक अधिकारी ऋचा शर्मा के कमेटी ह प्रदेस म दूनो चुनाव एक संघरा कराय के करे हे अनुसंसा ।
- सूरजपुर जिला के कोतवाली म पदस्थ एक प्रधान आरक्षक के माईलोगिन अउ नोनी के हत्या के मामला म घुस्साय लोगन मन करीन चक्काजाम ।
- प्रदेस म एक जुलाई ले समर्थन कीमत म धान अउ मक्का बिसाय बर किसान मनके करे जात हे पंजीयन—जउन इकतीस अक्टूबर तक चलही ।

एक राज्य—एक चुनाव

एक राज्य—एक चुनाव के तियारी म जुटे राज्य सरकार ह एखर तियारी करत हे। प्रशासनिक अधिकारी ऋचा शर्मा के कमेटी ह प्रदेस म दूनो चुनाव एक संघरा कराय के अनुसंसा करे हे। सूत्र के मुताबिक निकाय अउ पंचायत चुनाव के कारीकरम के घोसना एक संघरा करे जाही। चुनाव के कारीकरम चरण बध्द होही। एमा पंचायत अउ निकाय बर नामांकन के आने—आने तारिख तय करे जाही। मतदान बर दू तारिख तय करे जाही। वोट के गनती एक संघरा होही। ए प्रस्ताव म आखिरी फइसला राज्य कैबिनेट ल लेना हे। कैबिनेट के अवइया बइठका म एखर प्रस्ताव रखे जा सकत हे।

खबर के मुताबिक राज्य सरकार ह नगरीय निकाय अउ पंचायत चुनाव एक संघरा कराय जाय के संभावना म बिचार करे बर प्रशासनिक अधिकारी ऋचा शर्मा के अगुवई म आठ अगस्त के बनाय गे कमेटी ह अपन रिपोर्ट सरकार ले सौंप दे हे।

धान मक्का खरीदी-पंजीयन

प्रदेस म एक जुलाई ले समर्थन कीमत म धान अउ मक्का बिसाय बर किसान मनके पंजीयन करे जात हे, जउन इकतीस अक्टूबर तक चलही। सबो किसान अपन क्षेत्र के ग्रामीण कृषि विस्तार अधिकारी अउ सहकारी समिति प्रबंधक ले मिलके नवा पंजीयन करा सकत हे। कृषि विकास अउ किसान कल्याण जैव प्रौद्योगिकीय विभाग कोति ले प्रदेस के किसान मन ल आने-आने सरकारी योजना ले फायदा देबर एकीकृत किसान पोर्टल बनाय गेहे। ए पोर्टल म धान अउ मक्का खरीदी ल सामिल करे गेहे। किसान मन ल समर्थन कीमत म धान अउ मक्का बेचे बर ए पोर्टल म पंजीयन कराना जरूरी हे।

पीएससी सदस्य-नियुक्त

राज्य सरकार ह भारतीय प्रशासनिक सेवा के सेवा निवृत्त अधिकारी रीता शांडिल्य ल छत्तीसगढ़ लोक सेवा आयोग पीएससी सदस्य के रूप म नियुक्त करे हे। एखर आदेस सामान्य प्रशासन विभाग ह जारी कर देहे। जारी आदेस के मुताबिक सुश्री शांडिल्य ल छत्तीसगढ़ लोक सेवा आयोग के अध्यक्ष के प्रशासनिक जिम्मेवारी निभाय बर अधिकार दे गेहे।

खबर के मुताबिक छत्तीसगढ़ लोकसेवा आयोग म पहिली घांव महिला ल ए जिम्मेवारी सौंपे गेहे। इही बीच, छत्तीसगढ़ लोकसेवा आयोग दू हजार तेईस के परीक्षा के मुताबिक दू सौ बयालिस पद बर

होवइया इंटरव्यू ल अभी स्थगित कर दे गेहे। आयोग म नवा सदस्य अउ कार्यकारी अध्यक्ष के नियुक्ति के बाद सदस्य के संख्या म बढ़वार होय हे। एखर सेति इंटरव्यू बर बोर्ड के गठन नवा सिरा ले करे जाही।

सूरजपुर—हत्या

सूरजपुर जिला के कोतवाली म पदस्थ एक प्रधान आरक्षक के माईलोगिन अउ नोनी के हत्या के मामला आगू आय हे। दूनो के शव घर ले करीबन तीन किलोमीटर दूरिहा रद्दा तीर खेत म पाय गेहे। पुलिस मामला के जांच करत हे। खबर के मुताबिक प्रधान आरक्षक तालिब के घर सूरजपुर के महगवा रिंग रोड म हवय। प्रधान आरक्षक काली रतिहा जब घर लहुटिन त, पत्नी अउ नोनी ल घर म नइ पाके एखर सूचना पुलिस अधिकारी ल दीन। पुलिस टीम प्रधान आरक्षक के पत्नी अउ नोनी ल खोजत रिहीन। इही दउरान आज बिहनिया घर ले करीबन तीन किलोमीटर दूरिहा खेत म शव मिलिस।

इही बीच, घटना ले घुस्साय लोगन मन चक्का जाम करत आरोपी के जल्दी गिरफ्तारी के मांग करत एक संदिग्ध मनखे के घर म आगी लगा देहे। उन्हें, बीच-बचाव करे बर आय एसडीएम ल घलो घुस्सासय भीड़ के विरोध के सामना करे बर पड़िस। बताय जात हे कि काली रतिहा प्रधान आरक्षक के विवाद कुलदीप साहू गांव के मनखे संग होय रिहीस।

मानक महोत्सव

भारतीय मानक ब्यूरो कोति ले आज रईपुर म मानक महोत्सव मनाय जात हे। ए कारीकरम रईपुर लोकसभा सांसद बृजमोहन अग्रवाल माई पहूना के रूप म संघरीन। गौरतलब हे कि विश्व मानक महोत्सव के आयोजन करे जात हे। भारतीय मानक ब्यूरो रईपुर के निदेसक सुमीत कुमार ह बतइन हे कि मानक महोत्सव के उद्देश्य लोगन म गुणवत्ता कोति जागरूकता लाना हे। भारतीय मानक ब्यूरो कोति ले राजधानी

रईपुर के तेलाबांधा ईलाका म क्वालिटी वॉकेथॉन के आयोजन करे जाही। एमा बड़ संख्या म लइका मन सामिल होही।

मुख्यमंत्री—गुरुदर्शन

मुख्यमंत्री विष्णुदेव साय काली रईपुर जिला के भंडारपुरी धाम म गुरुदर्शन अउ संत समागम मेला म संघरीन। ओमन भंडारपुरी धाम म सतनामी समाज गुरु गद्दी आसन के दर्शन अउ पूजा—पाठ करके प्रदेशवासी मन बर खुसहाली के मानता मानिन। मुख्यमंत्री ह ए बेरा म हर बछर होवइया भंडारपुरी मेला बर बीस लाख रुपिया अउ मेला स्थल के बढ़वार खातिर तीस लाख रुपिया देके घोसना करीन। मुख्यमंत्री श्री साय ह भंडारपुरी म मिनी स्टेडियम के जीर्णोद्धार बर दस लाख रुपिया अउ अटल समरसता भवन बर बीस लाख रुपिया देके घोसना करीन।

रेलवे—स्वच्छता

रेलवे बोर्ड के अध्यक्ष अउ मुख्य कार्यकारी अधिकारी सतीश कुमार ह सबो महाप्रबंधक अउ मंडल रेल प्रबंधक ल स्वच्छता ही सेवा अभियान म बिसेस अभियान फोर प्वाइंट ओ के तहत देस के जम्मो स्टेसन म स्वच्छता चौपाल लगाय के निरदेस दे हे। ए बिसेस अभियान के दूसर चरण दू अक्टूबर ले सुरु होय हे, जउन इक्तीस अक्टूबर तक चलही। एमा यात्री मन संग सोज्जे गोठबात करत साफ—सफाई, रेलवे सुरक्षा अउ रेलवे परिसर म मिलइया सुविधा बर जागरूक करे जात हे।

ब्राउन शुगर—आरोपी गिरफ्तार

मुंगेली पुलिस ह छियालिस ग्राम ब्राउन सुगर संग छै झिन आरोपी ल गिरफ्तार करे हे। एखर कीमत नौ लाख बीस हजार रुपिया बताय जात हे। संगेसंग तस्करी म बउरे एक गाड़ी ल घलो जब्त करे गेहे। खबर के मुताबिक मुखबिर ले सूचना मिले के बाद थाना जरहा गांव के टीम कोति ले घेरा बंदी करे गीस। आरोपी ल पकड़े बर आने-आने जघा म पुलिस टीम ल तैनात करे गीस। ए दउरान काली संझा बिलासपुर कोति ले आवत एक ठिन कार ल पुलिस टीम कोति ले रोके गीस, जेमा छै झिन मनखे बइठे रिहीन। ए सबो के तलासी ले गीस। कार के भीतरी रखे एक ठिन बैग ले ब्राउन सुगर बरामद करे गीस। पुलिस कोति ले जम्मो आरोपी मन ल हिरासत म लेके ब्राउन सुगर अउ तस्करी म बउरे गो गाड़ी ले जब्त कर ले गेहे।

उहें, जशपुर जिला के तपकरा पुलिस ह एक गाड़ी ले गांजा के तस्करी करत पांच झिन आरोपी ल गिरफ्तार करे हे। आरोपी मन के तीर ले कुल इक्कीस किलो ले जादा गांजा बरामद होय हे, जेखर कीमत दू लाख दस हजार रुपिया बताय जात हे। जउन गाड़ी म गांजा ले जात रिहस ओला घलो जब्त करे गेहे। ए जम्मो आरोपी ओड़िसा के रहइवइया हरय अउ गांजा लेके जशपुर आत रिहीन हे।

ऐति, बलौदाबाजार-भाटापारा पुलिस ह गांव केसदा म अवैध रूप ले डंप करे गो पांच सौ बत्तीस पेटी सराब ल जब्त करे हे। आरोपी मन तीर ले छत्तीसगढ़ के संगेसंग मध्यप्रदेस के सराब घलो जब्त होय हे, जेखर कीमत चौँतीस लाख रुपिया ले जादा के आंके गेहे। ए मामला म तीन झिन आरोपी गिरफ्तार करे गेहे।

अमन साहू-रिमांड

तेलीबांधा सूट आउट के मुख्य आरोपी झारखंड के अमन साहू ल पुलिस ह आज रईपुर के बिसेस अदालत म पेस करीन। जिहां ले ओला उन्नीस अक्टूबर तक पुलिस रिमांड म भेज दे गेहे। एखर पहिली पुलिस काली रतिहा अमन साहू ल झारखंड के चाईबासा जेल ले राजधानी रईपुर ले के आय रिहीन।

खबर के मुताबिक अमन साहू उपर रईपुर म दू केस दरज हे। एमा पाछू अप्रैल महिना म तेलीबांधा के रोड निर्माण टेका फर्म के संचालक मन उपर असफल हमला के मामला घलो दरज हे। अमन साहू ल इही केस के संबंध म गिरफ्तारी अउ पूछताछ बर रईपुर लाय गेहे। ए सूट आउट म सामिल अमन साहू गैंग के करीबन दस आरोपी पहिलीच ले जेल म हवय।

मौसम

अउ अब जानन मौसम के हाल...

अवइया दू एक दिन म दक्षिण-पश्चिम मानसून के बिदाई होय के संभावना हे, एखर संगेसंग पूर्वी-उत्तर, पूर्वी हवा के परभाव ले उत्तर पूर्व मानसून के गतिविधि के सेति प्रदेस म काली एक-दू जघा हल्का ले मध्यम बरसा होय या फेर गरज-चमक संग छींटा बौछार होय के संभावना हवय।
